

दिनांक : 24.05.2026  
समय : 18.45 बजे  
आकाशवाणी जयपुर-अजमेर

## प्रादेशिक समाचार

- प्रदेश मांय काले ऊँ वंदे गंगा जल संरक्षण जन अभियान रह सरुआत व्हेला-जल संरक्षण ने जन आन्दोलन बणावण सारु व्हेला केई कार्यक्रम।
- राज्य सरकार राजस्थान निर्यात प्रोत्साहन नीति-2024 मांय खास बदलाव कर्या-तकनीकी अपग्रेडेशन सारु दिया जावण वाळी सब्सिडी ने एक करोड़ रिप्यां कर्या।
- केन्द्रीय कानून मंत्री अर्जुनराम मेघवाल कहयो-नारी शक्ति वंदन अधिनियम लागू करणो सरकार री ठावी प्राथमिकता।

अर

- प्रदेश रा घणखरा हलकां मांय करड़ी गर्मी अर लू रो असर बण्योड़ो है-आवता कुछ दिन राहत रा आसार नी।

000

प्रदेश मांय काले ऊँ जल संरक्षण ने जन आन्दोलन बणावण कानी महताऊ मान्या जा रिया वंदे गंगा जल संरक्षण अभियान री शुरुआत व्हेला। गंगा दशमी ऊँ सरु व्हे रियो ओ अभियान 5 जून विश्व पर्यावरण दिवस ताई चालेला।

000

राज्य सरकार, राजस्थान निर्यात प्रोत्साहन नीति-2024 मांय खास बदलाव कर्या है। ई नीति रे तैत तकनीकी अपग्रेडेशन सारु दिया जावण वाळी बत्ती ऊँ बत्ती सब्सिडी ने 50 लाख रिप्यां ऊँ बधा र एक करोड़ रिप्यां कर दीरीज्या है। मुख्यमंत्री राज्य बजट 2026-27 रे तैत रोकड अर विनियोग विधेयक माथे चर्चा रे दौरान ई बारा मांय ऐलाण कर्यो हो। उद्योग अर वाणिज्य आयुक्त श्री नीलाभ सक्सेना बतायो के तकनीकी अपग्रेडेशन माथे दिया जावण वाळी सब्सिडी बधावण ऊँ प्रदेश रा उद्योग वैश्विक दौड़ मुजब आधुनिक तकनीक ने अपणा सकेला। इण ऊँ उत्पादन बूतो बधण रे साथै-साथै गुणवत्ता मांय ई सुधार व्हेला।

इण रे साथै ई स्थानीय उत्पादां ने बधावो देवण सारु एक जिला-एक उत्पाद- ओडीओपी-2024 मांय दो महताऊ बदलाव करी ज्या है। इण रे तैत रत्नाभूषण उत्पाद ऊँ जुड़्या करोबारा रा फेलाव माथे ई मार्जिन मनी सब्सिडी दी जायेला। साथै ही निजू संस्थानां री मार्फत तकनीकी अपग्रेडेशन ई व्हे सकेला। उद्योग महकमां कानी ऊँ काडी ज्यी अधिसूचना मुजब सूक्ष्म इकाईयां ने 20 लाख रिप्यां अर लघु श्रेणी री इकाईयां ने 15 लाख रिप्यां ताई री मार्जिन सब्सिडी मिल सकेला। वटै ई निजू संस्थानां री मार्फत तकनीकी अपग्रेडेशन सारु पांच लाख रिप्यां री सब्सिडी दी जावेला।

000

अमेरिका रा विदेश मंत्री मार्को रुबियो रे काले जयपुर आवण रो कार्यक्रम है। वे आमेर महल देखेला। श्री रुबियो रा दौरा ने ले र जिला प्रशासन अर पुलिस री कानी ऊँ तगड़ी तैयारियां करी जावे। अमेरिकी विदेश मंत्री री ई जात्रा ने भारत अर अमेरिका रे बीच, सांस्कृतिक कूटनीति अर रणनीतिक संबंधां ऊँ जोड़ ने देख्यो जावे। अमेरिकी विदेश मंत्री मार्को रुबियो चार दिन रा भारत प्रवास दौरा माथे है। वे आज नुवी दिल्ली मांय विदेश मंत्री डॉ. एस. जयशंकर ऊँ मिल्या। हैदराबाद हाउस मांय व्ही बतळ मांय आधुनी ऐशिया संकट ऊँ पैदा मौजूदा हालात अर हिफाजती मदद माथे बतळ करी ज्यी।

इण रे पछे डॉक्टर डॉ. जयशंकर कह्यो की भारत अर अमेरिका रे बीचे गहरा वैश्विक सामरिक भागीदारी है। दोन्यू देशां रा संबंध ऊँ पूरी दुनिया माथे असर पड़्यो है। वणा कह्यो के बतळ रो सिलसिलों चालतो रहवेला अर इण रा चोखा नतीजा मिलण री आस है।

000

बालोतरा जिला री रिफाइनरी जसी महताऊ परियोजना ऊँ देश की ऊर्जा, हिफाजत रे साथै सामरिक अर माली हिफाजत मांय ई महताऊ भूमिका निभा रह्यो है। अठे सिवाणा रिंग कॉम्प्लेक्स मांय दुर्लभ खनिजां रो भण्डार मिल्यो है जो देश ने रॉकेट ऊँ ले र न्यूक्लियर प्लांट्स रा कच्चा माल उपलब्ध करवाण अर साफ ऊर्जा रा हलका मांय आगाडी बणावण मांय मदद करेला। मुख्यमंत्री भजन लाल शर्मा कह्यो के सिवाना रिंग कॉम्प्लेक्स अर सिवाना ग्रेनाईट मांय रेयर अर्थ एलीमेंट अर हेवी रेयर अर्थ एलीमेंट मिल्या है। वणा अहलकारां ने निर्देश के सिवाना रिंग कॉम्प्लेक्स रा असरदार कियान्वयन सारू प्रदेश मांय नोडल अहलकार नियुक्त कर्या जावे। जिण ऊँ काम मांय तेजी आ सके।

000

केंद्रीय कानून मंत्री अर्जुन राम मेघवाल आज भीलवाड़ा रा दौरा माथे रिया। जठे वणा हमीरगढ़ हवाई पट्टी रो जायजो लियो। इण रे पछे श्री मेघवाल हमीरगढ़ रीको हलका मांय भीलवाड़ा टैक्सटाइल ट्रेड फेडरेशन रा दफ्तर मांय कारोबारियां ऊँ बतळ करी। श्री मेघवाल खबरनवीसां ने बतळ मांय भीलवाड़ा मांय करोबारी उड़ान सुरू करण रा प्रस्ताव ने केन्द्रीय नागरिक उडयन मंत्री सामी राखण रो भरोसो दियो। नारी शक्ति वंदन अधिनियम रो जिको करता वणा कह्यो के इण ने लागू करणो केन्द्र सरकार री ठावी प्राथमिकता है।

000

केन्द्र सरकार वज़न अर माप री जांच प्रणाली ने मजबूत करण सारू जांच केंद्रां—जीएटीसी री भूमिका रो पसारो करेला। ई सारू साल 2013 रा कायदा मांय बदलाव करी ज्यो है। उपभोक्ता कार्य मंत्रालय आ जाणकारी देवता बतायो के नुवा कानूनां मांय जीएटीसी वज़न अर माप री 23 श्रेणियां रो सत्यापन कर सकेंला। इण मांय पेट्रोल—डीजल, सी.एन.जी, एलपीजी, एलएनजी अर हाइड्रोजन डिस्पेंसर जांच ई भेळी है। ई पहल रो मकसद कारोबार ने साफगोई बणावणो अर तकनीक ने बधावो देवणो है।

000

बांसवाड़ा रा गोविन्द गुरु जनजातीय विश्वविद्यालय मांय 'पंडित दीनदयाल उपाध्याय अध्ययन पीठ' री सुरूआत करी ज्यी है। राणा पूजा सभागार मांय आज व्ह्या एक कार्यक्रम मांय राजस्थान विधानसभा अध्यक्ष प्रो. वासुदेव देवनानी पीठ री विधिपूरण सुरूआत करी। श्री देवनानी कह्यो के विश्वविद्यालय कानी ऊँ थापित आ अध्ययन पीठ भारतीय ज्ञान परंपरा, एकात्म मानववाद, अंत्योदय, ग्राम विकास, सामाजिक समरसता अर भारतीय जीवन मूल्यां माथे आधारित राष्ट्र निर्माण जस्या मुद्दा माथे आला दर्जा रो शोध अर अकादमिक गतिविधियां रो खास केन्द्र बणेला।

000

फिट इंडिया मूवमेंट रे तैत **संडे ऑन साइकल** रे तैत प्रदेश रा न्यारा—न्यारा ठौड़ा साइकिल रैली योग अभ्यास समेत न्यारा—न्यारा फिटनेस गतिविधियां व्ही। न्यारी—न्यारी ठौड़ा अहलकारां, खिलाडियां, नौजवानां अर फिटनेस प्रेमियां उमाव रे साथे ई मुहिम मांय हिस्सो लिया। ई मौके जयपुर रा एसएमएस स्टेडियम रा चारू मेर साइकिल रैली व्ही। लोगां स्वस्थ जीवनशैली रे प्रति जाग जगावण सारू ओ आयोजन व्हयो। हनुमानगढ़, जैसलमेर, राजसमंद, कोटपूतली—बहरोड, सलूमबर, बालोतरा, झुंझनूं अर पाली मांय ई साइकिल रैली री मार्फत लोगां ने स्वास्थ्य रे प्रति जागरूक रहवण रो संदेश दीरीज्यो। केई ठौड़ा योग दिवस काउन्टर डाउन कार्यक्रम ने ई इण ऊँ जोड ने योगभ्यास, जुम्बा, रोप स्किपिंग समेत दूजी गतिविधियां व्ही।

000

प्रदेश रा घणकरी हलकां मांय करड़ी गर्मी अर लू रो असर बण्योडो है। मौसम केन्द्र जयपुर आज 18 जिलां मांय हीटवेव रो ऑरेंज अर येलो अलर्ट जारी कर्यो है। राजधानी जयपुर आज दिन मांय तेज तावड़ा मांय आम जिन्दगी मांथे असर पड़्यो।

जैसलमेर मांय आंधी चालण ऊँ लोगां ने गर्मी ऊँ थोड़ो आराम मिल्यो। चूरू मांय आखे दिन लू चालती रहवण ऊँ लोगां रा कामकाज माथे असर पड़्यो। बाड़मेर ऊँ म्हाणा खबरनवीस बतायो के वठे लोग करड़ी गर्मी ऊँ बचण सारू केई जतन कर रिया है।

-----  
मौसम महकमो आवता तीन-चार दिन राज्य रा घणकरां हलकां मांय मौसम साफ रहवण अर, धूलभरी हवा चालण, तापमान मांय 2 ऊँ 3 डिग्री सेल्सियस री बढवार री आस जतायी है। 26-27 मई ने आथूणी राजस्थान रा कुछ हलका मांय बत्ती रो तापमान 46 ऊँ 47 डिग्री सेल्सियस दर्ज होवण अर कटेई-कटेई लू चालण री आस जतायी है। वटे ई 28-29 मई ऊँ एक नुवा पश्चिमी विक्षोभ रा असर ऊँ प्रदेश रा कुछ हलका मांय आंधी अर अटेई-कटेई बिरखा होवण री आस जतायी है।

000

प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा खास कार्यक्रम "मन की बात" मांय 31 मई ने विचार बतावेला। आ ई कार्यक्रम री 134वीं कडी व्हेला। ई सारू आप ई मुफ्त नम्बर 1800-11-7800 माथे 29 मई तांई राय दे सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000